

गोस्वामी तुलसीदास

विरचित

# रामचरितमानस

सुंदरकांड



Sant Tulsi das's

Rāmcharitmānas

Sundar Kānd

## RAMCHARITMANAS : AN INTRODUCTION

Ramayana, considered part of Hindu Smriti, was written originally in Sanskrit by Sage Valmiki (3000 BC). Contained in 24,000 verses, this epic narrates Lord Ram of Ayodhya and his ayan (journey of life). Over a passage of time, Ramayana did not remain confined to just being a grand epic, it became a powerful symbol of India's social and cultural fabric. For centuries, its characters represented ideal role models - Ram as an ideal man, ideal husband, ideal son and a responsible ruler; Sita as an ideal wife, ideal daughter and Laxman as an ideal brother. Even today, the characters of Ramayana including Ravana (the enemy of the story) are fundamental to the grandeur cultural consciousness of India.

Long after Valmiki wrote Ramayana, Goswami Tulsidas (born 16<sup>th</sup> century) wrote Ramcharitmanas in his native language. With the passage of time, Tulsi's Ramcharitmanas, also known as Tulsi-krita Ramayana, became better known among Hindus in upper India than perhaps the Bible among the rustic population in England. As with the Bible and Shakespeare, Tulsi Ramayana's phrases have passed into the common speech. Not only are his sayings proverbial: his doctrine actually forms the most powerful religious influence in present-day Hinduism; and, though he founded no school and was never known as a Guru or master, he is everywhere accepted as an authoritative guide in religion and conduct of life.

Tulsi's Ramayana is a novel presentation of the great theme of Valmiki, but is in no sense a mere translation of the Sanskrit epic. It consists of seven books or chapters namely Bal Kand, Ayodhya Kand, Aranya Kand, Kiskindha Kand, Sundar Kand, Lanka Kand and Uttar Kand containing tales of King Dasaratha's court, the birth and boyhood of Rama and his brethren, his marriage with Sita - daughter of Janaka, his voluntary exile, the result of Kaikeyi's guile and Dasaratha's rash vow, the dwelling together of Rama and Sita in the great central Indian forest, her abduction by Ravana, the expedition to Lanka and the overthrow of the ravisher, and the life at Ayodhya after the return of the reunited pair. Ramcharitmanas is written in pure Avadhi or Eastern Hindi, in stanzas called chaupais, broken by 'dohas' or couplets, with an occasional sortha and chhand.

Here, you will find the text of Sundar Kand, 5<sup>th</sup> chapter of Ramcharitmanas.



॥ श्री गणेशाय नमः ॥

श्रीरामचरितमानस पञ्चम सोपान

सुन्दरकाण्ड

क्षोक

शान्तं शाश्वतमप्रमेयमनघं निर्वाणशान्तिप्रदं  
ब्रह्मशम्भुफणीन्द्रसेव्यमनिशं वेदांतवेदं विभुम् ।  
रामाख्यं जगदीश्वरं सुरगुरुं मायामनुष्यं हरिं  
वन्देऽहं करुणाकरं रघुवरं भूपालचूडामणिम् ॥१॥

नान्या स्पृहा रघुपते हृदयेऽस्मदीये  
सत्यं वदामि च भवानखिलान्तरात्मा ।  
भक्तिं प्रयच्छ रघुपुङ्गवं निर्भरां मे  
कामादिदोषरहितं कुरु मानसं च ॥२॥

अतुलितबलधामं हेमशैलाभद्रेहं  
दनुजवनकृशानुं जानिनामग्रगण्यम् ।  
सकलगुणनिधानं वानराणामधीशं  
रघुपतिप्रियभक्तं वातजातं नमामि ॥३॥

जामवंत के बचन सुहाए । सुनि हनुमंत हृदय अति भाए ॥  
तब लगि मोहि परिखेहु तुम्ह भाई । सहि दुख कंद मूल फल खाई ॥१॥  
जब लगि आवौं सीतहि देखी । होइहि काजु मोहि हरष बिसेषी ॥  
यह कह नाइ सबन्हि कहुँ माथा । चलेठ हरषि हियँ धरि रघुनाथा ॥२॥  
सिंधु तीर एक भूधर सुंदर । कौतुक कूदि चढेठ ता ऊपर ॥  
बार बार रघुबीर सँभारी । तरकेठ पवनतनय बल भारी ॥३॥  
जेहिं गिरि चरन देइ हनुमंता । चलेठ सो गा पाताल तुरंता ॥  
जिमि अमोघ रघुपति कर बाना । एही भाँति चलेठ हनुमाना ॥४॥  
जलनिधि रघुपति दूत बिचारी । तैं मैनाक होहि श्रमहारी ॥५॥

दोहा

हनुमान तेहि परसा कर पुनि कीन्ह प्रनाम ।  
राम काजु कीन्हें बिनु मोहि कहुँ विश्राम ॥१॥

जात पवनसुत देवन्ह देखा । जानैं कहुँ बल बुद्धि बिसेषा ॥

सुरसा नाम अहिन्ह कै माता । पठइन्हि आइ कही तेहिं बाता ॥१॥  
 आजु सुरन्ह मोहि दीन्ह अहारा । सुनत बचन कह पवनकुमारा ॥  
 राम काजु करि फिरि मैं आवौं । सीता कइ सुधि प्रभुहि सुनावौं ॥२॥  
 तब तव बदन पैठिहँ आई । सत्य कहँ मोहि जान दे माई ॥  
 कवनेहुँ जतन देइ नहिं जाना । ग्रससि न मोहि कहेत हनुमाना ॥३॥  
 जोजन भरि तिहिं बदनु पसारा । कपि तनु कीन्ह दुगुन बिस्तारा ॥  
 सोरह जोजन मुख तेहिं ठयऊ । तुरत पवनसुत बत्सि भयऊ ॥४॥  
 जस जस सुरसा बदनु बढावा । तासु दूल कपि रूप देखावा ॥  
 सत जोजन तेहिं आनन कीन्हा । अति लघु रूप पवनसुत लीन्हा ॥५॥  
 बदन पइठि पुनि बाहर आवा । मागा बिदा ताहि सिरु नावा ॥  
 मोहि सुरन्ह जेहि लागि पठावा । बुधि बल मरमु तोर मैं पावा ॥६॥

## दोहा

राम काजु सबु करिहु तुम्ह बल बुद्धि निधान ।  
 आसिष देइ गई सो हरषि चलेत हनुमान ॥२॥

निसिचरि एक सिंधु महुँ रहई । करि माया नभु के खग गहई ॥  
 जीव जंतु जे गगन उडाहीं । जल बिलोकि तिन्ह कै परिछाहीं ॥१॥  
 गहई छाहूँ सक सो न उडाई । एहि बिधि सदा गगनचर खाई ॥  
 सोइ छल हनुमान कहूँ कीन्हा । तासु कपटु कपि तुरतहिं चीन्हा ॥२॥  
 ताहि मारि मारुतसुत बीरा । बारिधि पार गयठ मतिधीरा ॥  
 तहाँ जाइ देखी बन सोभा । गुंजत चंचरीक मधु लोभा ॥३॥  
 नाना तरु फल फूल सुहाए । खग मृग बृंद देखि मन भाए ॥  
 सैल बिसाल देखि एक आगें । ता पर धाइ चढेत भय त्यागें ॥४॥  
 उमा न कछु कपि कै अधिकाई । प्रभु प्रताप जो कालहि खाई ॥  
 गिरि पर चढ़ि लंका तेहि देखी । कहि न जाइ अति दुर्ग बिसेषी ॥५॥  
 अति उतंग जलनिधि चहु पासा । कनक कोटि कर परम प्रकासा ॥६॥

## छंद

|        |        |         |        |       |            |          |          |          |     |
|--------|--------|---------|--------|-------|------------|----------|----------|----------|-----|
| कनक    | कोटि   | बिचित्र | मणि    | कृत   | सुंदरायतना | घना      | ।        |          |     |
| चउहट्ट | हट्ट   | सुबट्ट  | बीर्थी | चारु  | पुर        | बहुबिधि  | बना      | ॥        |     |
| गज     | बाजि   | खच्चर   | निकर   | पदचर  | रथ         | बरुथन्हि | को       | गनै      | ।   |
| बहुरूप | निसिचर | जूथ     | अतिबल  | सेन   | बरनत       | नहिं     | बनै      |          | ॥१॥ |
| बन     | बाग    | उपबन    | बाटिका | सर    | कूप        | बार्पी   | सोहर्हीं |          | ।   |
| नर     | नाग    | सुर     | गंधर्व | कन्या | रूप        | मुनि     | मन       | मोहर्हीं | ॥   |

कहुँ माल देह बिसाल सैल समान अतिबल गर्जहीं ।  
नाना अखारेन्ह भिरहिं बहुविधि एक एकन्ह तर्जहीं ॥२॥

करि जतन भट कोटिन्ह बिकट तन नगर चहुँ दिसि रच्छहीं ।  
कहुँ महिष मानुष धेनु खर अज खल निसाचर भच्छहीं ॥  
एहि लागि तुलसीदास इन्ह की कथा कछु एक है कही ।  
रघुबीर सर तीरथ सरीरन्हि त्यागि गति पैहहिं सही ॥३॥

## दोहा

पुर रखवारे देखि बहु कपि मन कीन्ह बिचार ।  
अति लघु रूप धरों निसि नगर करों पइसार ॥३॥

मसक समान रूप कपि धरी । लंकहि चलेऽ सुमिरि नरहरी ॥  
नाम लंकिनी एक निसिचरी । सो कह चलेसि मोहि निंदरी ॥१॥  
जानेहि नहीं मरमु सठ मोरा । मोर अहार जहाँ लगि चोरा ॥  
मुठिका एक महा कपि हनी । रुधिर बमत धरनीं डनमनी ॥२॥  
पुनि संभारि उठी सो लंका । जोरि पानि कर बिनय ससंका ॥  
जब रावनहि ब्रह्म कर दीन्हा । चलत विरंचि कहा मोहि चीन्हा ॥३॥  
बिकल होसि तैं कपि कै मारे । तब जानेसु निसिचर संघारे ॥  
तात मोर अति पुन्य बहूता । देखेऽ नयन राम कर दूता ॥४॥

## दोहा

तात स्वर्ग अपबर्ग सुख धरिअ तुला एक अंग ।  
तूल न ताहि सकल मिलि जो सुख लव सतसंग ॥४॥

प्रबिसि नगर कीजे सब काजा । हृदयँ राखि कोसलपुर राजा ॥  
गरल सुधा रिपु करहिं मिताई । गोपद सिंधु अनल सितलाई ॥१॥  
गरुड सुमेरु रेनु सम ताही । राम कृपा करि चितवा जाही ॥  
अति लघु रूप धरेऽ हनुमाना । पैठा नगर सुमिरि भगवाना ॥२॥  
मंदिर मंदिर प्रति करि सोधा । देखे जहाँ तहँ अगनित जोधा ॥  
गयठ दसानान मंदिर माहीं । अति बिचित्र कहि जात सो नाहीं ॥३॥  
सयन किएँ देखा कपि तेही । मंदिर महुँ न दीखि बैदेही ॥  
भवन एक पुनि दीख सुहावा । हरि मंदिर तहँ भिन्न बनावा ॥४॥

## दोहा

रामायुध अंकित गृह सोभा बरनि न जाइ ।  
नव तुलसिका बृंद तहँ देखि हरष कपिराई ॥५॥

लंका निसिचर निकर निवासा । इहाँ कहाँ सज्जन कर बासा ॥  
 मन महुँ तरक करैं कपि लागा । तेहीं समय बिभीषनु जागा ॥१॥  
 राम राम तोहि सुमिरन कीन्हा । हृदयँ हरष कपि सज्जन चीन्हा ॥  
 एहि सन हठि करिहतँ पहिचानी । साधु ते होइ न कारज हानी ॥२॥  
 बिप्र रूप धरि बचन सुनाए । सुनत बिभीषन उठि तहँ आए ॥  
 करि प्रनाम पूँछी कुसलाई । बिप्र कहहु निज कथा बुझाई ॥३॥  
 की तुम्ह हरि दासन्ह महँ कोई । मोरे हृदय प्रीति अति होइ ॥  
 की तुम्ह रामु दीन अनुरागी । आयहु मोहि करन बडभागी ॥४॥

## दोहा

तब हनुमंत कही सब राम कथा निज नाम ।  
 सुनत जुगल तन पुलक मन मगन सुमिरि गुन ग्राम ॥६॥

सुनहु पवनसुत रहनि हमारी । जिमि दसनन्हि महुँ जीभ बिचारी ॥  
 तात कबहुँ मोहि जानि अनाथा । करिहहि कृपा भानुकुल नाथा ॥१॥  
 तामस तनु कछु साधन नाहीं । प्रीति न पद सरोज मन माहीं ॥  
 अब मोहि भा भरोस हनुमंता । बिनु हरि कृपा मिलहिं नहिं संता ॥२॥  
 जौं रघुबीर अनुग्रह कीन्हा । तौं तुम्ह मोहि दरसु हठि दीन्हा ॥  
 सुनहु बिभीषन प्रभु कै रीती । करहिं सदा सेवक पर प्रीती ॥३॥  
 कहहु कवन मैं परम कुलीना । कपि चंचल सबहीं बिधि हीना ॥  
 प्रात लेइ जो नाम हमारा । तेहि दिन ताहि न मिले अहारा ॥४॥

## दोहा

अस मैं अधम सखा सुनु मोहू पर रघुबीर ।  
 कीन्ही कृपा सुमिरि गुन भरे बिलोचन नीर ॥७॥

जानतहुँ अस स्वामि बिसारी । फिरहिं ते काहे न होहिं दुखारी ॥  
 एहि बिधि कहत राम गुन ग्रामा । पावा अनिर्बाच्य विश्रामा ॥१॥  
 पुनि सब कथा बिभीषन कही । जेहि बिधि जनकसुता तहँ रही ॥  
 तब हनुमंत कहा सुनु भ्राता । देखी चलेँ जानकी माता ॥२॥  
 जुगुति बिभीषन सकल सुनाई । चलेड पवनसुत बिदा कराई ॥  
 करि सोइ रूप गयठ पुनि तहवाँ । बन असोक सीता रह जहवाँ ॥३॥  
 देखि मनहि महुँ कीन्ह प्रनामा । बैठेहि बीति जात निसि जामा ॥  
 कृस तनु सीस जटा एक बेनी । जपति हृदयँ रघुपति गुन श्रेनी ॥४॥

## दोहा

निज पद नयन दिएँ मन राम पद कमल लीन ।  
परम दुखी भा पवनसुत देखि जानकी दीन ॥८॥

तरु पल्लव महुँ रहा लुकाई । करइ बिचार करों का भाई ॥  
तेहि अवसर रावनु तहुँ आवा । संग नारि बहु किएँ बनावा ॥१॥  
बहु विधि खल सीतहि समझावा । साम दान भय भेद देखावा ॥  
कह रावनु सुनु सुमुखि सयानी । मंदोदरी आदि सब रानी ॥२॥  
तव अनुचरी करेँ पन मोरा । एक बार बिलोकु मम ओरा ॥  
तृन धरि ओट कहति बैदेही । सुमिरि अवधपति परम सनेही ॥३॥  
सुनु दसमुख खयोत प्रकासा । कबहुँ कि नलिनी करइ विकासा ॥  
अस मन समझु कहति जानकी । खल सुधि नहि रघुबीर बान की ॥४॥  
सठ सूर्णे हरि आनेहि मोही । अथम निलज्ज लाज नहि तोही ॥५॥

## दोहा

आपुहि सुनि खयोत सम रामहि भानु समान ।  
परुष बचन सुनि काढि असि बोला अति खिसिआन ॥९॥

सीता तैं मम कृत अपमाना । कटिहुँ तब सिर कठिन कृपाना ॥  
नाहिं त सपदि मानु मम बानी । सुमुखि होति न त जीवन हानी ॥१॥  
स्याम सरोज दाम सम सुंदर । प्रभु भुज करि कर सम दसकंदर ॥  
सो भुज कंठ कि तव असि घोरा । सुनु सठ अस प्रवान पन मोरा ॥२॥  
चंद्रहास हरु मम परितापं । रघुपति बिरह अनल संजातं ॥  
सीतल निसित बहसि बर धारा । कह सीता हरु मम दुख भारा ॥३॥  
सुनत बचन पुनि मारन धावा । मयतनयाँ कहि नीति बुझावा ॥  
कहेसि सकल निसिचरिन्ह बोलाई । सीतहि बहु विधि त्रासहु जाई ॥४॥  
मास दिवस महुँ कहा न माना । तौ मैं मारबि काढि कृपाना ॥५॥

## दोहा

भवन गयठ दसकंधर इहाँ पिसाचिनि बृंद ।  
सीतहि त्रास देखावहिं धरहि रूप बहु मंद ॥१०॥

त्रिजटा नाम राच्छसी एका । राम चरन रति निपुन बिबेका ॥  
सबन्हौ बोलि सुनाएसि सपना । सीतहि सेइ करहु हित अपना ॥१॥  
सपनैं बानर लंका जारी । जातुधान सेना सब मारी ॥  
खर आरूढ नगन दससीसा । मुंडित सिर खंडित भुज बीसा ॥२॥  
एहि विधि सो दच्छिन दिसि जाई । लंका मनहुँ बिभीषण पाई ॥

नगर फिरी रघुबीर दोहाई । तब प्रभु सीता बोलि पठाई ॥३॥  
 यह सपना मैं कहँ पुकारी । होइहि सत्य गएँ दिन चारी ॥  
 तासु बचन सुनि ते सब डरीं । जनकसुता के चरनन्हि पर्हि ॥४॥

## दोहा

जहँ तहँ गई सकल तब सीता कर मन सोच ।  
 मास दिवस बीतें मोहि मारिहि निसिचर पोच ॥१॥

त्रिजटा सन बोलीं कर जोरी । मातु बिपति संगिनि तैं मोरी ॥  
 तजौं देह करु बेगि उपाई । दुसह बिरहु अब नहिं सहि जाई ॥१॥  
 आनि काठ रचु चिता बनाई । मातु अनल पुनि देहु लगाई ॥  
 सत्य करहि मम प्रीति सयानी । सुनै को श्रवन सूल सम बानी ॥२॥  
 सुनत बचन पद गहि समझाएसि । प्रभु प्रताप बल सुजसु सुनाएसि ॥  
 निसि न अनल मिल सुनु सुकुमारी । अस कहि सो निज भवन सिधारी ॥३॥  
 कह सीता बिधि भा प्रतिकूला । मिलिहि न पावक मिटिहि न सूला ॥  
 देखिअत प्रगट गगन अंगरा । अवनि न आवत एकठ तारा ॥४॥  
 पावकमय ससि सवत न आगी । मानहुँ मोहि जानि हतभागी ॥  
 सुनहि बिनय मम बिटप असोका । सत्य नाम करु हरु मम सोका ॥५॥  
 नूतन किसलय अनल समाना । देहि अगिनि जनि करहि निदाना ॥  
 देखि परम बिरहाकुल सीता । सो छन कपिहि कलप सम बीता ॥६॥

## दोहा

कपि करि हृदय बिचार दीन्हि मुद्रिका डारि तब ।  
 जनु असोक अंगर दीन्ह हरषि उठि कर गहेठ ॥१॥

तब देखी मुद्रिका मनोहर । राम नाम अंकित अति सुंदर ॥  
 चकित चितव मुदरी पहिचानी । हरष विषाद हृदय अकुलानी ॥१॥  
 जीति को सकइ अजय रघुराई । माया तैं असि रचि नहि जाई ॥  
 सीता मन बिचार कर नाना । मधुर बचन बोलेठ हनुमाना ॥२॥  
 रामचंद्र गुन बरनै लागा । सुनतहि सीता कर दुख भागा ॥  
 लागीं सुनैं श्रवन मन लाई । आदिहु तैं सब कथा सुनाई ॥३॥  
 श्रवनामृत जेहिं कथा सुहाई । कहीं सो प्रगट होति किन भाई ॥  
 तब हनुमंत निकट चलि गयऊ । फिरि बैठीं मन बिसमय भयऊ ॥४॥  
 राम दूत मैं मातु जानकी । सत्य सपथ करुनानिधान की ॥  
 यह मुद्रिका मातु मैं आनी । दीन्हि राम तुम्ह कहँ सहिदानी ॥५॥  
 नर बानरहि संग कहु कैसें । कहीं कथा भई संगति जैसें ॥६॥

## दोहा

कपि के बचन सप्रेम सुनि उपजा मन बिस्वास ।  
जाना मन क्रम बचन यह कृपासिंधु कर दास ॥१३॥

हरिजन हानि प्रीति अति गाढ़ी । सजल नयन पुलकावलि बाढ़ी ॥  
बूढ़त बिरह जलधि हनुमाना । भयहु तात मो कहुँ जलजाना ॥१॥  
अब कहु कुसल जाँ बलिहारी । अनुज सहित सुख भवन खरारी ॥  
कोमलचित कृपाल रघुराई । कपि केहि हेतु धरी नितुराई ॥२॥  
सहज बानि सेवक सुख दायक । कबहुँक सुरति करत रघुनायक ॥  
कबहुँ नयन मम सीतल ताता । होइहहि निरखि स्याम मृदु गाता ॥३॥  
बचनु न आव नयन भरे बारी । अहह नाथ हौं निपट बिसारी ॥  
देखि परम बिरहाकुल सीता । बोला कपि मृदु बचन बिनीता ॥४॥  
मातु कुसल प्रभु अनुज समेता । तव दुख दुखी सुकृपा निकेता ॥  
जनि जननी मानहु जियँ ऊना । तुम्ह ते प्रेमु राम के दूना ॥५॥

## दोहा

रघुपति कर संदेसु अब सुनु जननी धरि धीर ।  
अस कहि कपि गदगद भयठ भरे बिलोचन नीर ॥१४॥

कहेऽ राम बियोग तव सीता । मो कहुँ सकल भए बिपरीता ॥  
नव तरु किसलय मनहुँ कृसानू । कालनिसा सम निसि ससि भानू ॥१॥  
कुबलय बिपिन कुंत बन सरिसा । बारिद तपत तेल जनु बरिसा ॥  
जे हित रहे करत तेइ पीरा । उरग स्वास सम त्रिविधि समीरा ॥२॥  
कहेहू तें कछु दुख घटि होई । काहि कहों यह जान न कोई ॥  
तत्व प्रेम कर मम अरु तोरा । जानत प्रिया एकु मनु मोरा ॥३॥  
सो मनु सदा रहत तोहि पाहीं । जानु प्रीति रसु एतनेहि माहीं ॥  
प्रभु संदेसु सुनत बैदेही । मगन प्रेम तन सुधि नहिं तेही ॥४॥  
कह कपि हृदयँ धीर धरु माता । सुमिरु राम सेवक सुखदाता ॥  
उर आनहु रघुपति प्रभुताई । सुनि मम बचन तजहु कदराई ॥५॥

## दोहा

निसिचर निकर पतंग सम रघुपति बान कृसानु ।  
जननी हृदयँ धीर धरु जरे निसाचर जानु ॥१५॥

जैं रघुबीर होति सुधि पाई । करते नहिं बिलंबु रघुराई ॥  
राम बान रबि उँ जानकी । तम बरूथ कहुँ जातुधान की ॥१॥

अबहिं मातु मैं जाँ लवाई । प्रभु आयसु नहिं राम दोहाई ॥  
 कछुक दिवस जननी धरु धीरा । कपिन्ह सहित अङ्गहिं रघुबीरा ॥२॥  
 निसिचर मारि तोहि लै जैहिं । तिहुँ पुर नारदादि जसु गैहिं ॥  
 हैं सुत कपि सब तुम्हहि समाना । जातुधान अति भट बलवाना ॥३॥  
 मोरै हृदय परम संदेहा । सुनि कपि प्रगट कीन्हि निज देहा ॥  
 कनक भूधराकार सरीरा । समर भयंकर अतिबल बीरा ॥४॥  
 सीता मन भरोस तब भयऊ । पुनि लघु रूप पवनसुत लयऊ ॥५॥

## दोहा

सुनु मात साखामृग नहिं बल बुद्धि बिसाल ।  
 प्रभु प्रताप तैं गरुडहि खाइ परम लघु व्याल ॥१६॥

मन संतोष सुनत कपि बानी । भगति प्रताप तेज बल सानी ॥  
 आसिष दीन्हि रामप्रिय जाना । होहु तात बल सील निधाना ॥१॥  
 अजर अमर गुननिधि सुत होहू । करहुँ बहुत रघुनायक छोहू ॥  
 करहुँ कृपा प्रभु अस सुनि काना । निर्भर प्रेम मगन हनुमाना ॥२॥  
 बार बार नाएसि पद सीसा । बोला बचन जोरि कर कीसा ॥  
 अब कृतकृत्य भयठैं मैं माता । आसिष तव अमोघ बिख्याता ॥३॥  
 सुनहु मातु मोहि अतिसय भूखा । लागि देखि सुंदर फल रुखा ॥  
 सुनु सुत करहिं विपिन रखवारी । परम सुभट रजनीचर भारी ॥४॥  
 तिन्हि कर भय माता मोहि नाहीं । जौं तुम्ह सुख मानहु मन माहीं ॥५॥

## दोहा

देखि बुद्धि बल निपुन कपि कहेऽ जानकों जाहु ।  
 रघुपति चरन हृदयं धरि तात मधुर फल खाहु ॥१७॥

चलेऽ नाइ सिर पैठेऽ बागा । फल खाएसि तरु तौरैं लागा ॥  
 रहे तहां बहु भट रखवारे । कछु मारेसि कछु जाइ पुकारे ॥१॥  
 नाथ एक आवा कपि भारी । तेहिं असोक बाटिका उजारी ॥  
 खाएसि फल अरु बिटप उपारे । रच्छक मर्दि मर्दि महि डारे ॥२॥  
 सुनि रावन पठए भट नाना । तिन्हहि देखि गर्जेऽ हनुमाना ॥  
 सब रजनीचर कपि संघारे । गए पुकारत कछु अधमारे ॥३॥  
 पुनि पठयठ तेहिं अच्छकुमारा । चला संग लै सुभट अपारा ॥  
 आवत देखि बिटप गहि तर्जा । ताहि निपाति महाधुनि गर्जा ॥४॥

## दोहा

कछु मारेसि कछु मर्देसि कछु मिलएसि धरि धूरि ।  
कछु पुनि जाइ पुकारे प्रभु मर्कट बल भूरि ॥१८॥

सुनि सुत बध लंकेस रिसाना । पठएसि मेघनाद बलवाना ॥  
मारसि जनि सुत बाँधेसु ताही । देखिअ कपिहि कहाँ कर आही ॥१॥  
चला इंद्रजित अतुलित जोधा । बंधु निधन सुनि उपजा क्रोधा ॥  
कपि देखा दारून भट आवा । कटकटाइ गर्जा अरु धावा ॥२॥  
अति बिसाल तरु एक उपारा । बिरथ कीन्ह लंकेस कुमारा ॥  
रहे महाभट ताके संगा । गहि गहि कपि मर्दइ निज अंगा ॥३॥  
तिन्हहि निपाति ताहि सन बाजा । भिरे जुगल मानहुँ गजराजा ॥  
मुठिका मारि चढा तरु जाई । ताहि एक छन मुरुछा आई ॥४॥  
उठि बहोरि कीन्हसि बहु माया । जीति न जाइ प्रभंजन जाया ॥५॥

## दोहा

ब्रह्म अरु तेहि साँधा कपि मन कीन्ह बिचार ।  
जौं न ब्रह्मसर मानहुँ महिमा मिटइ अपार ॥१९॥

ब्रह्मान कपि कहुँ तेहिं मारा । परतिहुँ बार कटकु संघारा ॥  
तेहिं देखा कपि मुरुछित भयठ । नागपास बांधेसि लै गयठ ॥१॥  
जासु नाम जपि सुनहु भवानी । भव बंधन काटहिं नर ज्यानी ॥  
तासु दूत कि बंध तरु आवा । प्रभु कारज लगि कपिहि बँधावा ॥२॥  
कपि बंधन सुनि निसिचर धाए । कौतुक लागि सभाँ सब आए ॥  
दसमुख सभा दीखि कपि जाई । कहि न जाइ कछु अति प्रभुताई ॥३॥  
कर जोरे सुर दिसिप बिनीता । भूकुटि बिलोकत सकल सभीता ॥  
देखि प्रताप न कपि मन संका । जिमि अहिगन महुँ गरुड असंका ॥४॥

## दोहा

कपिहि बिलोकि दसानन बिहसा कहि दुर्बाद ।  
सुत बध सुरति कीन्हि पुनि उपजा हृदय बिषाद ॥२०॥

कह लंकेस कयन तैं कीसा । केहि कैं बल घालेहि बन खीसा ॥  
की धौं श्रवन सुनेहि नहि मोही । देखउँ अति असंक सठ तोही ॥१॥  
मारे निसिचर केहिं अपराधा । कहु सठ तोहि न प्रान कड बाधा ॥  
सुनु रावन ब्रह्मांड निकाया । पाइ जासु बल बिरचित माया ॥२॥  
जारें बल बिरंचि हरि ईसा । पालत सृजत हरत दससीसा ॥  
जा बल सीस धरत सहसानन । अंडकोस समेत गिरि कानन ॥३॥

धरइ जो बिबिध देह सुत्राता । तुम्ह से सठन्ह सिखावनु दाता ॥  
हर कोदंड कठिन जेहिं भंजा । तेहि समेत नृप दल मद गंजा ॥४॥  
खर दूषन त्रिसिरा अरु बाली । बधे सकल अतुलित बलसाली ॥५॥

## दोहा

जाके बल लवलेस तें जितेहु चराचर झारि ।  
तासु दूत मैं जा करि हरि आनेहु प्रिय नारि ॥२१॥

जानेठ मैं तुम्हारि प्रभुताई । सहसबाहु सन परी लराई ॥  
समर बालि सन करि जसु पावा । सुनि कपि बचन बिहसि बिहरावा ॥१॥  
खायँ फल प्रभु लागी भूखा । कपि सुभाव तें तोरेँ रुखा ॥  
सब कें देह परम प्रिय स्वामी । मारहिं मोहि कुमारग गामी ॥२॥  
जिन्ह मोहि मारा ते मैं मारे । तेहि पर बाँधेँ तनय तुम्हारे ॥  
मोहि न कछु बाँधे कइ लाजा । कीन्ह चहँ निज प्रभु कर काजा ॥३॥  
बिनती करेँ जोरि कर रावन । सुनहु मान तजि मोर सिखावन ॥  
देखहु तुम्ह निज कुलहि बिचारी । भ्रम तजि भजहु भगत भय हारी ॥४॥  
जाके डर अति काल डेराई । जो सुर असुर चराचर खाई ॥  
तासों बयरु कबहुँ नहिं कीजै । मोरे कहें जानकी दीजै ॥५॥

## दोहा

प्रनतपाल रघुनायक करुना सिंधु खरारि ।  
गएँ सरन प्रभु राखिहैं तव अपराध बिसारि ॥२२॥

राम चरन पंकज उर धरहू । लंकाँ अचल राज तुम्ह करहू ॥  
रिषि पुलस्ति जसु बिमल मयंका । तेहि ससि महुँ जनि होहु कलंका ॥१॥  
राम नाम बिनु गिरा न सोहा । देखु बिचारि त्यागि मद मोहा ॥  
बसन हीन नहिं सोह सुरारी । सब भूषन भूषित बर नारी ॥२॥  
राम बिमुख संपति प्रभुताई । जाइ रही पाई बिनु पाई ॥  
सजल मूल जिन्ह सरितन्ह नाहीं । बरषि गएँ पुनि तबहिं सुखाहीं ॥३॥  
सुनु दसकंठ कहँ पन रोपी । बिमुख राम त्राता नहिं कोपी ॥  
संकर सहस बिष्णु अज तोही । सकहिं न राखि राम कर द्रोही ॥४॥

## दोहा

मोहमूल बहु सूल प्रद त्यागहु तम अभिमान ।  
भजहु राम रघुनायक कृपा सिंधु भगवान ॥२३॥

जदपि कही कपि अति हित बानी । भगति बिबेक बिरति नय सानी ॥

बोला बिहसि महा अभिमानी । मिला हमहि कपि गुर बड़ ग्यानी ॥१॥  
 मृत्यु निकट आई खल तोही । लागेसि अथम सिखावन मोही ॥  
 उलटा होइहि कह हनुमाना । मतिभ्रम तोर प्रगट मैं जाना ॥२॥  
 सुनि कपि बचन बहुत खिसिआना । बेगि न हरहु मूढ़ कर प्राना ॥  
 सुनत निसाचर मारन धाए । सचिवन्ह सहित बिभीषनु आए ॥३॥  
 नाइ सीस करि बिनय बहूता । नीति बिरोधा न मारिअ दूता ॥  
 आन दंड कछु करिअ गोसाँई । सबहीं कहा मंत्र भल भाई ॥४॥  
 सुनत बिहसि बोला दसकंधर । अंग भंग करि पठइअ बंदर ॥५॥

## दोहा

कपि कै ममता पूँछ पर सबहि कहउं समुझाइ ।  
 तेल बोरि पट बाँधि पुनि पावक देहु लगाइ ॥२४॥

पूँछ हीन बानर तहँ जाइहि । तब सठ निज नाथहि लइ आइहि ॥  
 जिन्ह कै कीन्हसि बहुत बड़ाई । देखउं मैं तिन्ह कै प्रभुताई ॥१॥  
 बचन सुनत कपि मन मुसुकाना । भइ सहाय सारद मैं जाना ॥  
 जातुधान सुनि रावन बचना । लागे रचें मूढ़ सोइ रचना ॥२॥  
 रहा न नगर बसन घृत तेला । बाढ़ी पूँछ कीन्ह कपि खेला ॥  
 कौतुक कहँ आए पुरबासी । मारहिं चरन करहिं बहु हाँसी ॥३॥  
 बाजहिं ढोल देहिं सब तारी । नगर फेरि पुनि पूँछ प्रजारी ॥  
 पावक जरत देखि हनुमंता । भयठ परम लघुरूप तुरंता ॥४॥  
 निबुकि चढ़ेठ कपि कनक अटारी । भइं सभीत निसाचर नारी ॥५॥

## दोहा

हरि प्रेरित तेहि अवसर चले मरुत उनचास ।  
 अट्टहास करि गर्जा कपि बढ़ि लाग अकास ॥२५॥

देह बिसाल परम हरुआई । मंदिर तैं मंदिर चढ़ धाई ॥  
 जरइ नगर भा लोग बिहाला । झापट लपट बहु कोटि कराला ॥१॥  
 तात मातु हा सुनिअ पुकारा । एहिं अवसर को हमहि उबारा ॥  
 हम जो कहा यह कपि नहिं होई । बानर रूप धरें सुर कोई ॥२॥  
 साथु अवग्या कर फलु ऐसा । जरइ नगर अनाथ कर जैसा ॥  
 जारा नगर निमिष एक माहीं । एक बिभीषन कर गृह नाहीं ॥३॥  
 ता कर दूत अनल जेहिं सिरिजा । जरा न सो तेहि कारन गिरिजा ॥  
 उलटि पलटि लंका सब जारी । कूदि परा पुनि सिंधु मझारी ॥४॥

## दोहा

पूँछ बुझाइ खोइ श्रम धरि लघु रूप बहोरि ।  
जनकसुता के आगे ठाढ भयउ कर जोरि ॥२६॥

मातु मोहि दीजे कछु चीन्हा । जैसे रघुनायक मोहि दीन्हा ॥  
चूडामनि उतारि तब दयऊ । हरष समेत पवनसुत लयऊ ॥१॥  
कहेहु तात अस मोर प्रनामा । सब प्रकार प्रभु पूरनकामा ॥  
दीन दयाल बिरिदु सँभारी । हरहु नाथ मम संकट भारी ॥२॥  
तात सक्रसुत कथा सुनाएहु । बान प्रताप प्रभुहि समुझाएहु ॥  
मास दिवस महुँ नाथ न आवा । तौ पुनि मोहि जिअत नहिं पावा ॥३॥  
कहु कपि केहि बिधि राखों प्राना । तुम्हहू तात कहत अब जाना ॥  
तोहि देखि सीतलि भइ छाती । पुनि मो कहुँ सोइ दिनु सो राती ॥४॥

## दोहा

जनकसुतहि समुझाइ करि बहु बिधि धीरजु दीन्ह ।  
चरन कमल सिरु नाइ कपि गवनु राम पहिं कीन्ह ॥२७॥

चलत महाधुनि गर्जसि भारी । गर्भ स्रवहिं सुनि निसिचर नारी ॥  
नाधि सिंधु एहि पारहि आवा । सबद किलिकिला कपिन्ह सुनावा ॥१॥  
हरषे सब बिलोकि हनुमाना । नूतन जन्म कपिन्ह तब जाना ॥  
मुख प्रसन्न तन तेज बिराजा । कीन्हेसि रामचंद्र कर काजा ॥२॥  
मिले सकल अति भए सुखारी । तलफत मीन पाव जिमि बारी ॥  
चले हरषि रघुनायक पासा । पूँछत कहत नवल इतिहासा ॥३॥  
तब मधुबन भीतर सब आए । अंगद संमत मधु फल खाए ॥  
रखवारे जब बरजन लागे मुष्टि प्रहार हनत सब भागे ॥४॥

## दोहा

जाइ पुकारे ते सब बन उजार जुबराज ।  
सुन सुग्रीव हरष कपि करि आए प्रभु काज ॥२८॥

जों न होति सीता सुधि पाई । मधुबन के फल सकहिं कि खाई ॥  
एहि बिधि मन बिचार कर राजा । आइ गए कपि सहित समाजा ॥१॥  
आइ सबन्हि नावा पद सीसा । मिलेऽ सबन्हि अति प्रेम कपीसा ॥  
पूँछी कुसल कुसल पद देखी । राम कृपाँ भा काजु बिसेषी ॥२॥  
नाथ काजु कीन्हेऽ हनुमाना । राखे सकल कपिन्ह के प्राना ॥  
सुनि सुग्रीव बहुरि तेहि मिलेऽ । कपिन्ह सहित रघुपति पहिं चलेऽ ॥३॥

राम कपिन्ह जब आवत देखा । किएँ काजु मन हरष बिसेषा ॥  
फटिक सिला बैठे द्वौ भाई । परे सकल कपि चरनन्हि जाई ॥४॥

## दोहा

प्रीति सहित सब भेटे रघुपति करुना पुंज ।  
पूँछी कुसल नाथ अब कुसल देखि पद कंज ॥२९॥

जामवंत कह सुनु रघुराया । जा पर नाथ करहु तुम्ह दाया ॥  
ताहि सदा सुभ कुसल निरंतर । सुर नर मुनि प्रसन्न ता ऊपर ॥१॥  
सोइ बिजई बिनई गुन सागर । तासु सुजसु त्रैलोक उजागर ॥  
प्रभु कीं कृपा भयउ सब काजू । जन्म हमार सुफल भा आजू ॥२॥  
नाथ पवनसुत कीन्हि जो करनी । सहस्रहुँ मुख न जाइ सो बरनी ॥  
पवनतनय के चरित सुहाए । जामवंत रघुपतिहि सुनाए ॥३॥  
सुनत कृपानिधि मन अति भाए । पुनि हनुमान हरषि हियँ लाए ॥  
कहहु तात केहि भाँति जानकी । रहति करति रच्छा स्वप्रान की ॥४॥

## दोहा

नाम पाहरु दिवस निसि ध्यान तुम्हार कपाट ।  
लोचन निज पद जंत्रित जाहिं प्रान केहिं बाट ॥३०॥

चलत मोहि चूडामनि दीन्ही । रघुपति हृदयँ लाइ सोइ लीन्ही ॥  
नाथ जुगल लोचन भरि बारी । बचन कहे कछु जनककुमारी ॥१॥  
अनुज समेत गहेहु प्रभु चरना । दीन बंधु प्रनतारति हरना ॥  
मन क्रम बचन चरन अनुरागी । केहिं अपराध नाथ हौं त्यागी ॥२॥  
अवगुन एक मोर मैं माना । बिछुरत प्रान न कीन्ह पयाना ॥  
नाथ सो नयनन्हि को अपराधा । निसरत प्रान करहिं हठि बाधा ॥३॥  
बिरह अगिनि तनु तूल समीरा । स्वास जरइ छन माहिं सरीरा ॥  
नयन स्वहिं जलु निज हित लागी । जरै न पाव देह बिरहागी ॥४॥  
सीता कै अति बिपति विसाला । बिनहिं कहें भलि दीनदयाला ॥५॥

## दोहा

निमिष निमिष करुनानिधि जाहिं कलप सम बीति ।  
बेगि चलिअ प्रभु आनिअ भुज बल खल दल जीति ॥३१॥

सुनि सीता दुख प्रभु सुख अयना । भरि आए जल राजिव नयना ॥  
बचन कायँ मन मम गति जाही । सपनेहुँ बूझिअ बिपति कि ताहि ॥१॥  
कह हनुमंत बिपति प्रभु सोइ । जब तव सुमिरन भजन न होई ॥

केतिक बात प्रभु जातुधान की । रिपुहि जीति आनिबी जानकी ॥२॥  
 सुनु कपि तोहि समान उपकारी । नहिं कोठ सुर नर मुनि तनुधारी ॥  
 प्रति उपकार करौं का तोरा । सनमुख होइ न सकत मन मोरा ॥३॥  
 सुनु सत तोहि उरिन मैं नाहीं । देखेठँ करि बिचार मन माहीं ॥  
 पुनि पुनि कपिहि चितव सुरत्राता । लोचन नीर पुलक अति गाता ॥४॥

## दोहा

सुनि प्रभु बचन बिलोकि मुख गात हरषि हनुमंत ।  
 चरन परेऽ प्रेमाकुल त्राहि त्राहि भगवंत ॥३२॥

बार बार प्रभु चहइ उठावा । प्रेम मग्न तेहि उठब न भावा ॥  
 प्रभु कर पंकज कपि के सीसा । सुमिरि सो दसा मग्न गौरीसा ॥१॥  
 सावधान मन करि पुनि संकर । लागे कहन कथा अति सुंदर ॥  
 कपि उठाइ प्रभु हृदयँ लगावा । कर गहि परम निकट बैठावा ॥२॥  
 कहु कपि रावन पालित लंका । केहि बिधि दहेठ दुर्ग अति बंका ॥  
 प्रभु प्रसन्न जाना हनुमाना । बोला बचन बिगत हनुमाना ॥३॥  
 साखामृग कै बड़ि मनुसाई । साखा तें साखा पर जाई ॥  
 नाघि सिंधु हाटकपुर जारा । निसिचर गन बिधि बिपिन उजारा ॥४॥  
 सो सब तव प्रताप रघुराई । नाथ न कछू मोरि प्रभुताई ॥५॥

## दोहा

ता कहुँ प्रभु कछु अगम नहिं जा पर तुम्ह अनुकूल ।  
 तव प्रभावँ वडवानलहि जारि सकड़ खलु तूल ॥३३॥

नाथ भगति अति सुखदायनी । देहु कृपा करि अनपायनी ॥  
 सुनि प्रभु परम सरल कपि बानी । एवमस्तु तब कहेठ भवानी ॥१॥  
 उमा राम सुभाऊ जेहिं जाना । ताहि भजनु तजि भाव न आना ॥  
 यह संबाद जासु उर आवा । रघुपति चरन भगति सोइ पावा ॥२॥  
 सुनि प्रभु बचन कहहिं कपि बृदा । जय जय जय कृपाल सुखकंदा ॥  
 तब रघुपति कपिपतिहि बोलावा । कहा चलौं कर करहु बनावा ॥३॥  
 अब बिलंबु केहि कारन कीजे । तुरत कपिन्ह कहुँ आयसु दीजे ॥  
 कौतुक देखि सुमन बहु बरणी । नभ तें भवन चले सुर हरषी ॥४॥

## दोहा

कपिपति बेगि बोलाए आए जूथप जूथ ।  
 नाना बरन अतुल बल बानर भालु बरुथ ॥३४॥

प्रभु पद पंकज नावहिं सीसा । गर्जहिं भालु महाबल कीसा ॥  
देखी राम सकल कपि सेना । चितइ कृपा करि राजिव नैना ॥१॥  
राम कृपा बल पाइ कपिंदा । भए पच्छजुत मनहुँ गिरिंदा ॥  
हरषि राम तब कीन्ह पयाना । सगुन भए सुंदर सुभ नाना ॥२॥  
जासु सकल मंगलमय कीती । तासु पयान सगुन यह नीती ॥  
प्रभु पयान जाना बैदेहीं । फरकि बाम अँग जनु कहि देहीं ॥३॥  
जोइ जोइ सगुन जानकिहि होई । असगुन भयठ रावनहि सोई ॥  
चला कटकु को बरनैं पारा । गर्जहिं बानर भालु अपारा ॥४॥  
नख आयुध गिरि पादपधारी । चले गगन महि इच्छाचारी ॥  
केहरिनाद भालु कपि करहीं । डगमगाहिं दिग्गज चिक्करहीं ॥५॥

## छंद

चिक्करहिं दिग्गज डोल महि गिरि लोल सागर खरभरे ।  
मन हरष सब गंधर्ब सुर मुनि नाग किंनर दुख टरे ॥  
कटकटहिं मर्कट बिकट भट बहु कोटि कोटिन्ह धावहीं ।  
जय राम प्रबल प्रताप कोसलनाथ गुन गन गावहीं ॥१॥

सहि सक न भार उदार अहिपति बार बारहिं मोहई ।  
गह दसन पुनि पुनि कमठ पृष्ठ कठोर सो किमि सोहई ॥  
रघुबीर रुचिर प्रयान प्रस्थिति जानि परम सुहावनी ।  
जनु कमठ खर्पर सर्पराज सो लिखत अबिचल पावनी ॥२॥

## दोहा

एहि बिधि जाइ कृपानिधि उतरे सागर तीर ।  
जहँ तहँ लागे खान फल भालु बिपुल कपि बीर ॥३५॥

उहाँ निसाचर रहहिं ससंका । जब तें जारि गयठ कपि लंका ॥  
निज निज गृह सब करहिं बिचारा । नहिं निसिचर कुल केर उबारा ॥१॥  
जासु दूत बल बरनि न जाई । तेहि आँ पुर कवन भलाई ॥  
दूतिन्ह सन सुनि पुरजन बानी । मंदोदरी अधिक अकुलानी ॥२॥  
रहसि जोरि कर पति पग लागी । बोली बचन नीति रस पागी ॥  
कंत करष हरि सन परिहरहू । मोर कहा अति हित हियँ धरहू ॥३॥  
समुझत जासु दूत कइ करनी । सर्वहिं गर्भ रजनीचर धरनी ॥  
तासु नारि निज सचिव बोलाई । पठवहु कंत जो चहहु भलाई ॥४॥  
तव कुल कमल बिपिन दुखदायई । सीता सीत निसा सम आई ॥  
सुनहु नाथ सीता बिनु दीन्हे । हित न तुम्हार संभु अज कीन्हे ॥५॥

## दोहा

राम बान अहि गन सरिस निकर निसाचर भेक ।  
जब लगि ग्रसत न तब लगि जतनु करहु तजि टेक ॥३६॥

श्रवन सुनि सठ ता करि बानी । बिहसा जगत बिदित अभिमानी ॥  
सभय सुभाऊ नारि कर साचा । मंगल महुँ भय मन अति काचा ॥१॥  
जौं आवइ मर्कट कटकाई । जिअहिं बिचारे निसिचर खाई ॥  
कंपहिं लोकप जाकीं त्रासा । तासु नारि सभीत बडि हासा ॥२॥  
अस कहि बिहसि ताहि उर लाई । चलेठ सभाँ ममता अधिकाई ॥  
मंदोदरी हृदयँ कर चिंता । भयउ कंत पर बिधि बिपरीता ॥३॥  
बैठेठ सभाँ खबरि असि पाई । सिंधु पार सेना सब आई ॥  
बूझेसि सचिव उचित मत कहेहू । ते सब हँसे मष करि रहेहू ॥४॥  
जितेहु सुरासुर तब श्रम नाहीं । नर बानर केहि लेखे माहीं ॥५॥

## दोहा

सचिव बैद गुर तीनि जौं प्रिय बोलहिं भय आस ।  
राज धर्म तन तीनि कर होइ बेगिहीं नास ॥३७॥

सोइ रावन कहुँ बनी सहाई । अस्तुति करहिं सुनाइ सुनाई ॥  
अवसर जानि बिभीषनु आवा । भ्राता चरन सीसु तेहिं नावा ॥१॥  
पुनि सिरु नाइ थैठ निज आसन । बोला बचन पाइ अनुसासन ॥  
जौं कृपाल पूँछिहु मोहि बाता । मति अनुरूप कहउँ हित ताता ॥२॥  
जो आपन चाहै कल्याना । सुजसु सुमति सुभ गति सुख नाना ॥  
सो परनारि लिलार गोसाई । तजउ चउथि के चंद कि नाई ॥३॥  
चौदह भुवन एक पति होई । भूतद्रोह तिष्ठ नहिं सोई ॥  
गुन सागर नागर नर जोऊ । अलप लोभ भल कहइ न कोऊ ॥४॥

## दोहा

काम क्रोध मद लोभ सब नाथ नरक के पंथ ।  
सब परिहरि रघुबीरहि भजहु भजहिं जेहि संत ॥३८॥

तात राम नहिं नर भूपाला । भुवनेस्वर कालहु कर काला ॥  
ब्रह्म अनामय अज भगवंता । व्यापक अजित अनादि अनंता ॥१॥  
गो द्विज धेनु देव हितकारी । कृपा सिंधु मानुष तनुधारी ॥  
जन रंजन भंजन खल ब्राता । बेद धर्म रच्छक सुनु भ्राता ॥२॥  
ताहि बयरु तजि नाइअ माथा । प्रनतारति भंजन रघुनाथा ॥

देहु नाथ प्रभु कहुँ बैदेही । भजहु राम बिनु हेतु सनेही ॥३॥  
 सरन गएँ प्रभु ताहु न त्यागा । विस्व द्रोह कृत अघ जेहि लागा ॥  
 जासु नाम त्रय ताप नसावन । सोई प्रभु प्रगट समुझु जियँ रावन ॥४॥

## दोहा

बार बार पद लागँ विनय करँ दससीस ।  
 परिहरि मान मोह मद भजहु कोसलाधीस ॥३९(क)॥  
 मुनि पुलस्ति निज सिष्य सन कहि पठई यह बात ।  
 तुरत सो मैं प्रभु सन कही पाइ सुअवसरु तात ॥३९(ख)॥

माल्यवंत अति सचिव सथाना । तासु बचन सुनि अति सुख माना ॥  
 तात अनुज तव नीति बिभूषन । सो उर धरहु जो कहत बिभीषन ॥१॥  
 रिपु उत्करष कहत सठ दोऊ । दूरि न करहु इहाँ हइ कोऊ ॥  
 माल्यवंत गृह गयउ बहोरी । कहहु बिभीषनु पुनि कर जोरी ॥२॥  
 सुमति कुमति सब कैं उर रहहीं । नाथ पुरान निगम अस कहहीं ॥  
 जहाँ सुमति तहँ संपति नाना । जहाँ कुमति तहँ बिपति निदाना ॥३॥  
 तव उर कुमति बसी बिपरीता । हित अनहित मानहु रिपु प्रीता ॥  
 कालराति निसिचर कुल केरी । तेहि सीता पर प्रीति घनेरी ॥४॥

## दोहा

तात चरन गहि मागँ राखहु मोर दुलार ।  
 सीत देहु राम कहुँ अहित न होइ तुम्हार ॥४०॥

बुध पुरान श्रुति संमत बानी । कही बिभीषन नीति बखानी ॥  
 सुनत दसानन उठा रिसाई । खल तोहि निकट मृत्य अब आई ॥१॥  
 जिअसि सदा सठ मोर जिआवा । रिपु कर पच्छ मूढ तोहि भावा ॥  
 कहसि न खल अस को जग माहीं । भुज बल जाहि जिता मैं नाहीं ॥२॥  
 मम पुर बसि तपसिन्ह पर प्रीती । सठ मिलु जाइ तिन्हहि कहु नीती ॥  
 अस कहि कीन्हेसि चरन प्रहारा । अनुज गहे पद बारहि बारा ॥३॥  
 उमा संत कह इहइ बडाई । मंद करत जो करइ भलाई ॥  
 तुम्ह पितु सरिस भलेहि मोहि मारा । रामु भजै हित नाथ तुम्हारा ॥४॥  
 सचिव संग लै नभ पथ गयऊ । सबहि सुनाइ कहत अस भयऊ ॥५॥

## दोहा

रामु सत्यसंकल्प प्रभु सभा कालबस तोरि ।  
 मैं रघुबीर सरन अब जाँ देहु जनि खोरि ॥४१॥

अस कहि चला बिभीषनु जबहीं । आयूहीन भए सब तबहीं ॥  
 साथु अवग्या तुरत भवानी । कर कल्यान अखिल कै हानी ॥१॥  
 रावन जबहिं बिभीषन त्यागा । भयउ बिभव बिनु तबहिं अभागा ॥  
 चलेठ हरषि रघुनायक पाहीं । करत मनोरथ बहु मन माहीं ॥२॥  
 देखिहठँ जाइ चरन जलजाता । अरुन मृदुल सेवक सुखदाता ॥  
 जे पद पसरि तरी रिषिनारी । दंडक कानन पावनकारी ॥३॥  
 जे पद जनकसुताँ उर लाए । कपट कुरंग संग धर धाए ॥  
 हर उर सर सरोज पद जेरई । अहोभाग्य मैं देखिहठँ तेरई ॥४॥

## दोहा

जिन्ह पायन्ह के पादुकन्हि भरतु रहे मन लाइ ।  
 ते पद आजु बिलोकिहठँ इन्ह नयनन्हि अब जाइ ॥४२॥

एहि बिधि करत सप्रेम विचारा । आयउ सपदि सिंधु एहिं पारा ॥  
 कपिन्ह बिभीषनु आवत देखा । जान कोठ रिपु दूत बिसेषा ॥१॥  
 ताहि राखि कपीस पहिं आए । समाचार सब ताहि सुनाए ॥  
 कह सुग्रीव सुनहु रघुराई । आवा मिलन दसानन भाई ॥२॥  
 कह प्रभु सखा बूझिए काहा । कहइ कपीस सुनहु नरनाहा ॥  
 जानि न जाइ निसाचर माया । कामरूप केहि कारन आया ॥३॥  
 भेद हमार लेन सठ आवा । राखिअ बँधि मोहि अस भावा ॥  
 सखा नीति तुम्ह नीकि विचारी । मम पन सरनागत भयहारी ॥४॥  
 सुनि प्रभु बचन हरष हनुमाना । सरनागत बच्छल भगवाना ॥५॥

## दोहा

सरनागत कहुँ जे तजहिं निज अनहित अनुमानि ।  
 ते नर पावँर पापमय तिन्हहि बिलोकत हानि ॥४३॥

कोटि बिप्र बध लागहिं जाहू । आएँ सरन तजँ नहिं ताहू ॥  
 सनमुख होइ जीव मोहि जबहीं । जन्म कोटि अघ नासहिं तबहीं ॥१॥  
 पापवंत कर सहज सुभाऊ । भजहु मोर तेहि भाव न काऊ ॥  
 जौं पै दुष्टहृदय सोइ होई । मोरै सनमुख आव कि सोई ॥२॥  
 निर्मल मन जन सो मोहि पावा । मोहि कपट छल छिद्र न भावा ॥  
 भेद लेन पठवा दससीसा । तबहुँ न कछु भय हानि कपीसा ॥३॥  
 जग महुँ सखा निसाचर जेते । लछिमनु हनइ निमिष महुँ तेते ॥  
 जो सभीत आवा सरनाई । राखिहठँ ताहि प्रान की नाई ॥४॥

## दोहा

उभय भाँति तेहि आनहु हँसि कह कृपानिकेत ।  
जय कृपाल कहि कपि चले अंगद हनू समेत ॥४४॥

सादर तेहि आगें करि बानर । चले जहाँ रघुपति करुनाकर ॥  
दूरिहि ते देखे द्वौ भ्राता । नयनानंद दान के दाता ॥१॥  
बहुरि राम छबिधाम बिलोकी । रहेठ ठुकि एकटक पल रोकी ॥  
भुज प्रलंब कंजारुन लोचन । स्यामल गात प्रनत भय मोचन ॥२॥  
सिंध कंध आयत उर सोहा । आनन अमित मदन मन मोहा ॥  
नयन नीर पुलकित अति गाता । मन धरि धीर कही मृदु बाता ॥३॥  
नाथ दसानन कर मैं भ्राता । निसिचर बंस जनम सुरत्राता ॥  
सहज पापप्रिय तामस देहा । जथा उल्कहि तम पर नेहा ॥४॥

## दोहा

श्वन सुजसु सुनि आयँ प्रभु भंजन भव भीर ।  
त्राहि त्राहि आरति हरन सरन सुखद रघुबीर ॥४५॥

अस कहि करत दंडवत देखा । तुरत उठे प्रभु हरष बिसेषा ॥  
दीन बचन सुनि प्रभु मन भावा । भुज बिसाल गहि हृदयँ लगावा ॥१॥  
अनुज सहित मिलि ढिग बैठारी । बोले बचन भगत भय हारी ॥  
कहु लंकेस सहित परिवारा । कुसल कुठाहर बास तुम्हारा ॥२॥  
खल मंडलीं बसहु दिन राती । सखा धरम निबहइ केहि भाँती ॥  
मैं जानँ तुम्हारि सब रीती । अति नय निपुन न भाव अनीती ॥३॥  
बरु भल बास नरक कर ताता । दुष्ट संग जनि देइ बिधाता ॥  
अब पद देखि कुसल रघुराया । जौं तुम्ह कीन्हि जानि जन दाया ॥४॥

## दोहा

तब लगि कुसल न जीव कहुँ सपनेहुँ मन बिश्राम ।  
जब लगि भजन न राम कहुँ सोक धाम तजि काम ॥४६॥

तब लगि हृदयँ बसत खल नाना । लोभ मोह मच्छर मद माना ॥  
जब लगि उर न बसत रघुनाथा । धरै चाप सायक कटि भाथा ॥१॥  
ममता तरुन तमी अँधिआरी । राग द्वेष उल्क सुखकारी ॥  
तब लगि बसति जीव मन माहीं । जब लगि प्रभु प्रताप रबि नाहीं ॥२॥  
अब मैं कुसल मिटे भय भारे । देखि राम पद कमल तुम्हारे ॥  
तुम्ह कृपाल जा पर अनुकूला । ताहि न व्याप त्रिबिध भव सूला ॥३॥

मैं निसिचर अति अधम सुभाऊ । सुभ आचरनु कीन्ह नहिं काऊ ॥  
जासु रूप मुनि ध्यान न आवा । तेहिं प्रभु हरषि हृदयँ मोहि लावा ॥४॥

## दोहा

अहोभाग्य मम अमित अति राम कृपा सुख पुंज ।  
देखेँ नयन बिरंचि सिव सेव्य जुगल पद कंज ॥४७॥

सुनहु सखा निज कहउँ सुभाऊ । जान भुसुंडि संभु गिरिजाऊ ॥  
जौं नर होइ चराचर द्रोही । आवौ सभय सरन तकि मोही ॥१॥  
तजि मद मोह कपट छल नाना । करउँ सद्य तेहि साधु समाना ॥  
जननी जनक बंधु सुत दारा । तनु धनु भवन सुहृद परिवारा ॥२॥  
सब कै ममता ताग बटोरी । मम पद मनहि बाँध बरि डोरी ॥  
समदरसी इच्छा कछु नाहीं । हरष सोक भय नहिं मन माहीं ॥३॥  
अस सज्जन मम उर बस कैसे । लोभी हृदयँ बसइ धनु जैसे ॥  
तुम्ह सारिखे संत प्रिय मोरे । धरउँ देह नहिं आन निहोरे ॥४॥

## दोहा

सगुन उपासक परहित निरत नीति दृढ नेम ।  
ते नर प्रान समान मम जिन्ह के द्विज पद प्रेम ॥४८॥

सुन लंकेस सकल गुन तोरे । तार्ते तुम्ह अतिसय प्रिय मोरे ॥  
राम बचन सुनि बानर जूथा । सकल कहहिं जय कृपा बरुथा ॥१॥  
सुनत बिभीषनु प्रभु कै बानी । नहिं अघात श्रवनामृत जानी ॥  
पद अंबुज गहि बारहिं बारा । हृदयँ समात न प्रेमु अपारा ॥२॥  
सुनहु देव सचराचर स्वामी । प्रनतपाल उर अंतरजामी ॥  
उर कछु प्रथम बासना रही । प्रभु पद प्रीति सरित सो बही ॥३॥  
अब कृपाल निज भगति पावनी । देहु सदा सिव मन भावनी ॥  
एवमस्तु कहि प्रभु रनधीरा । मागा तुरत सिंधु कर नीरा ॥४॥  
जदपि सखा तव इच्छा नाहीं । मोर दरसु अमोघ जग माहीं ॥  
अस कहि राम तिलक तेहि सारा । सुमन वृष्टि नभ भई अपारा ॥५॥

## दोहा

रावन क्रोध अनल निज स्वास समीर प्रचंड ।  
जरत बिभीषनु राखेऽ दीन्हेऽ राजु अखंड ॥४९(क)॥  
जो संपति सिव रावनहि दीन्ह दिएँ दस माथ ।  
सोइ संपदा बिभीषनहि सकुचि दीन्ह रघुनाथ ॥४९(ख)॥

अस प्रभु छाडि भजहिं जे आना । ते नर पसु बिनु पूँछ बिषाना ॥  
 निज जन जानि ताहि अपनावा । प्रभु सुभाव कपि कुल मन भावा ॥१॥  
 पुनि सर्वग्य सर्व उर बासी । सर्वरूप सब रहित उदासी ॥  
 बोले बचन नीति प्रतिपालक । कारन मनुज दनुज कुल घालक ॥२॥  
 सुनु कपीस लंकापति बीरा । केहि बिधि तरिअ जलधि गंभीरा ॥  
 संकुल मकर उरग झष जाती । अति अगाध दुस्तर सब भाँती ॥३॥  
 कह लंकेस सुनहु रघुनायक । कोटि सिंधु सोषक तव सायक ॥  
 जयपि तदपि नीति असि गाई । बिनय करिअ सागर सन जाई ॥४॥

## दोहा

प्रभु तुम्हार कुलगुर जलधि कहिहि उपाय बिचारि ।  
 बिनु प्रयास सागर तरिहि सकल भालु कपि धारि ॥५०॥

सखा कही तुम्ह नीकि उपाई । करिअ दैव जौ होइ सहाई ॥  
 मंत्र न यह लछिमन मन भावा । राम बचन सुनि अति दुख पावा ॥१॥  
 नाथ दैव कर कवन भरोसा । सोषिअ सिंधु करिअ मन रोसा ॥  
 कादर मन कहुँ एक अधारा । दैव दैव आलसी पुकारा ॥२॥  
 सुनत बिहसि बोले रघुबीरा । ऐसेहि करब धरहु मन धीरा ॥  
 अस कहि प्रभु अनुजहि समुझाई । सिंधि समीप गए रघुराई ॥३॥  
 प्रथम प्रनाम कीन्ह सिरु नाई । बैठे पुनि तट दर्भ डसाई ॥  
 जबहि बिभीषण प्रभु पहिं आए । पाछे रावन दूत पठाए ॥४॥

## दोहा

सकल चरित तिन्ह देखे धरें कपट कपि देह ।  
 प्रभु गुन हृदयँ सराहहि सरनागत पर नेह ॥५१॥

प्रगट बखानहि राम सुभाऊ । अति सप्रेम गा बिसरि दुराऊ ॥  
 रिपु के दूत कपिन्ह तब जाने । सकल बाँधि कपीस पहिं आने ॥१॥  
 कह सुग्रीव सुनहु सब बानर । अंग भंग करि पठवहु निसिचर ॥  
 सुनि सुग्रीव बचन कपि धाए । बाँधि कटक चहु पास फिराए ॥२॥  
 बहु प्रकार मारन कपि लागे । दीन पुकारत तदपि न त्यागे ॥  
 जो हमार हर नासा काना । तेहि कोसलाधीस कै आना ॥३॥  
 सुनि लछिमन सब निकट बोलाए । दया लागि हँसि तुरत छोड़ाए ॥  
 रावन कर दीजहु यह पाती । लछिमन बचन बाचु कुलघाती ॥४॥

## दोहा

कहेहु मुखागर मूढ सन मम संदेसु उदार ।  
सीता देइ मिलहु न त आवा कालु तुम्हार ॥५२॥

तुरत नाइ लछिमन पद माथा । चले दूत बरनत गुन गाता ॥  
कहत राम जसु लंकाँ आए । रावन चरन सीस तिन्ह नाए ॥१॥  
बिहसि दसानन पूँछी बाता । कहसि न सुक आपनि कुसलाता ॥  
पुनि कहु खबरि विभीषन केरी । जाहि मृत्यु आई अति नेरी ॥२॥  
करत राज लंका सठ त्यागी । होइहि जव कर कीट अभागी ॥  
पुनि कहु भालु कीस कटकाई । कठिन काल प्रेरित चलि आई ॥३॥  
जिन्ह के जीवन कर रखवारा । भयउ मृदुल चित सिंधु विचारा ॥  
कहु तपसिन्ह के बात बहोरी । जिन्ह के हृदयँ त्रास अति मोरी ॥४॥

## दोहा

की भइ भेंट कि फिरि गए श्रवन सुजसु सुनि मोर ।  
कहसि न रिपु दल तेज बल बहुत चकित चित तोर ॥५३॥

नाथ कृपा करि पूँछेहु जैसें । मानहु कहा क्रोध तजि तैसें ॥  
मिला जाइ जब अनुज तुम्हारा । जातहिं राम तिलक तेहि सारा ॥१॥  
रावन दूत हमहि सुनि काना । कपिन्ह बाँधि दीन्हे दुख नाना ॥  
श्रवन नासिका काटै लागे । राम सपथ दीन्हे हम त्यागे ॥२॥  
पूँछिहु नाथ राम कटकाई । बदन कोटि सत बरनि न जाई ॥  
नाना बरन भालु कपि धारी । बिकटानन बिसाल भयकारी ॥३॥  
जेहिं पुर दहेत हतेत सुत तोरा । सकल कपिन्ह महै तेहि बलु थोरा ॥  
अमित नाम भट कठिन कराला । अमित नाग बल बिपुल बिसाला ॥४॥

## दोहा

द्विबिद मयंद नील नल अंगद गद बिकटासि ।  
दधिमुख केहरि निसठ सठ जामवंत बलरासि ॥५४॥

ए कपि सब सुग्रीव समाना । इन्ह सम कोटिन्ह गनइ को नाना ॥  
राम कृपाँ अतुलित बल तिन्हर्हीं । तृन समान त्रैलोकहि गनर्हीं ॥१॥  
अस मैं सुना श्रवन दसकंधर । पदुम अठारह जूथप बंदर ॥  
नाथ कटक महै सो कपि नाहीं । जो न तुम्हहि जीतै रन माहीं ॥२॥  
परम क्रोध मीजहिं सब हाथा । आयसु पै न देहि रघुनाथा ॥  
सोषहिं सिंधु सहित झष व्याला । पूरहिं न त भरि कुधर बिसाला ॥३॥  
मर्दि गर्द मिलवहिं दससीसा । ऐसेइ बचन कहहिं सब कीसा ॥

गर्जहिं तर्जहिं सहज असंका । मानहुँ ग्रसन चहत हहिं लंका ॥४॥

## दोहा

सहज सूर कपि भालु सब पुनि सिर पर प्रभु राम ।  
रावन काल कोटि कहुँ जीति सकहिं संग्राम ॥५५॥

राम तेज बल बुधि बिपुलाई । सेष सहस सत सकहिं न गाई ॥  
सक सर एक सोषि सत सागर । तव भ्रातहि पूँछेठ नय नागर ॥१॥  
तासु बचन सुनि सागर पाहीं । मागत पंथ कृपा मन माहीं ॥  
सुनत बचन बिहसा दससीसा । जौं असि मति सहाय कृत कीसा ॥२॥  
सहज भीरु कर बचन द्वाई । सागर सन ठानी मचलाई ॥  
मूढ मृषा का करसि बडाई । रिपु बल बुद्धि थाह मैं पाई ॥३॥  
सचिव सभीत बिभीषण जाके । बिजय बिभूति कहुँ जग ताके ॥  
सुनि खल बचन दूत रिस बाढी । समय बिचार पत्रिका काढी ॥४॥  
रामानुज दीन्ही यह पाती । नाथ बचाइ जुडावहु छाती ॥  
बिहसि बाम कर लीन्ही रावन । सचिव बोलि सठ लाग बचावन ॥५॥

## दोहा

बातन्ह मनहि रिझाइ सठ जनि घालसि कुल खीस ।  
राम बिरोध न उबरसि सरन बिष्टु अज ईस ॥५६(क)॥  
की तजि मान अनुज इव प्रभु पद पंकज भृंग ।  
होहि कि राम सरानल खल कुल सहित पतंग ॥५६(ख)॥

सुनत सभय मन मुख मुसुकाई । कहत दसानन सबहि सुनाई ॥  
भूमि परा कर गहत अकासा । लघु तापस कर बाग बिलासा ॥१॥  
कह सुक नाथ सत्य सब बानी । समुझहु छाडि प्रकृति अभिमानी ॥  
सुनहु बचन मम परिहरि क्रोधा । नाथ राम सन तजहु बिरोधा ॥२॥  
अति कोमल रघुबीर सुभाऊ । जयपि अखिल लोक कर राऊ ॥  
मिलत कृपा तुम्ह पर प्रभु करिही । ऊर अपराध न एकठ धरही ॥३॥  
जनकसुता रघुनाथहि दीजे । एतना कहा मोर प्रभु कीजे ॥  
जब तेहि कहा देन बैदेही । चरन प्रहार कीन्ह सठ तेही ॥४॥  
नाइ चरन सिरु चला सो तहुँ । कृपासिंधु रघुनायक जहुँ ॥  
करि प्रनामु निज कथा सुनाई । राम कृपाँ आपनि गति पाई ॥५॥  
रिषि अगस्ति कीं साप भवानी । राछस भयठ रहा मुनि ज्यानी ॥  
बंदि राम पद बारहिं बारा । मुनि निज आश्रम कहुँ पगु धारा ॥६॥

## दोहा

बिनय न मानत जलथि जङ गए तीनि दिन बीति ।  
बोले राम सकोप तब भय बिनु होइ न प्रीति ॥५७॥

लछिमन बान सरासन आनू । सोर्णे बारिथि बिसिख कृसानू ॥  
सठ सन बिनय कुटिल सन प्रीती । सहज कृपन सन सुंदर नीती ॥१॥  
ममता रत सन ग्यान कहानी । अति लोभी सन बिरति बखानी ॥  
क्रोधिहि सम कामिहि हरि कथा । ऊसर बीज बाँ फल जथा ॥२॥  
अस कहि रघुपति चाप चढावा । यह मत लछिमन के मन भावा ॥  
संधानेऽ प्रभु बिसिख कराला । उठी उदधि उर अंतर ज्वाला ॥३॥  
मकर उरग झष गन अकुलाने । जरत जंतु जलनिधि जब जाने ॥  
कनक थार भरि मनि गन नाना । बिप्र रूप आयठ तजि माना ॥४॥

## दोहा

काटेहि पइ कदरी फरइ कोटि जतन कोउ सींच ।  
बिनय न मान खगेस सुनु डाटेहि पइ नव नीच ॥५८॥

सभय सिंधु गहि पद प्रभु केरे । छमहु नाथ सब अवगुन मेरे ॥  
गगन समीर अनल जल धरनी । इन्ह कइ नाथ सहज जङ करनी ॥१॥  
तव प्रेरित मायाँ उपजाए । सृष्टि हेतु सब ग्रंथनि गाए ॥  
प्रभु आयसु जेहि कहँ जस अहई । सो तेहि भाँति रहें सुख लहई ॥२॥  
प्रभु भल कीन्ह मोहि सिख दीन्ही । मरजादा पुनि तुम्हरी कीन्ही ॥  
ढोल गँवार सूद्र पसु नारी । सकल ताड़ना के अधिकारी ॥३॥  
प्रभु प्रताप मैं जाब सुखाई । उतरिहि कटकु न मोरि बड़ाई ॥  
प्रभु अग्या अपेल श्रुति गाई । करौं सो बेगि जो तुम्हहि सोहाई ॥४॥

## दोहा

सुनत बिनीत बचन अति कह कृपाल मुसुकाइ ।  
जेहि बिधि उतरैं कपि कटकु तात सो कहहु उपाइ ॥५९॥

नाथ नील नल कपि द्वौ भाई । लरिकाई रिषि आसिष पाई ।  
तिन्ह के परस किएं गिरि भारे । तरिहहि जलथि प्रताप तुम्हरे ॥१॥  
मैं पुनि उर धरि प्रभु प्रभुताई । करिहठ बल अनुमान सहाई ॥  
एहि बिधि नाथ पयोधि बँधाइअ । जेहिं यह सुजसु लोक तिहुँ गाइअ ॥२॥  
एहिं सर मम उत्तर तट बासी । हतहु नाथ खल नर अघ रासी ॥  
सुनि कृपाल सागर मन पीरा । तुरतहि हरी राम रन धीरा ॥३॥

देखि राम बल पौरुष भारी । हरषि पयोनिधि भयऽ सुखारी ॥  
सकल चरित कहि प्रभुहि सुनावा । चरन बंदि पाथोधि सिधावा ॥४॥

छंद

|     |      |       |       |              |        |        |       |       |
|-----|------|-------|-------|--------------|--------|--------|-------|-------|
| निज | भवन  | गवनेऽ | सिंधु | श्रीरघुपतिहि | यह     | मत     | भायङ् | ।     |
| यह  | चरित | कलि   | मल    | हर           | जथामति | दास    | तुलसी | गाऊङ् |
| सुख | भवन  | संसय  | समन   | दवन          | बिषाद  | रघुपति | गुन   | गना   |
| तजि | सकल  | आस    | भरोस  | गावहि        | सुनहि  | संतत   | सठ    | मना   |

दोहा

सकल सुमंगल दायक रघुनायक गुन गन ।  
सादर सुनहि ते तरहि भव सिंधु बिना जलजान ॥६०॥

इति श्रीमद्रामचरितमानसे सकलकलिकलुषविध्वंसने पञ्चमः सोपानः समाप्तः ।

## सुंदरकाण्ड समाप्त